

ՀՕՄ-ի Թորոնթոյի «Ռուբինա» մասնաճիւղի տարեկան տօնավաճառը տեղի ունեցաւ Շաբաթ և Կիրակի, 5-6 Նոյեմբեր, 2016 –ի շաբաթավերջին Թորոնթոյի Հայ Կեդրոնէն ներս և պասկուեցաւ բացառիկ յաջողութեամբ:

2016-ի տօնավաճառի յանձնախումբը իր ենթայանձնախումբերով մօտ 10 ամիսներու ընթացքին ծրագրեցին սոյն ձեռնարկը:

Ահաւասիկ շաբաթ առաւօտ այցելուները արդէն իսկ կանուխէն հաւաքուած Հայ Կեդրոնի սրահը անհամբեր կը սպասէին բացման արարողութեան որուն ներկայ էին Ս. Աստուածածնայ եկեղեցւոյ աւագ քահանայ Տէր Կոմիտաս Փանոսեան, եկեղեցւոյ հոգաբարձութիւն, Հ.Յ.Դ. կոմիտէութեան, ՀՕՄ-ի Գանատայի Շրջանային վարչութեան և քոյր միութիւններու ներկայացուցիչներ:

Բացման խօսքը կատարեց տօնավաճառի յանձնախումբի ատենապետ ընկի. Լորա Մալեան: ՀՕՄ-ի «Ռուբինա» մասնաճիւղի վարչութեան և տօնավաճառի յանձնախումբի անունով բարի գալուստ մաղթելէ ետք, ընկերուհին մասնաւորապէս շեշտը դրաւ սոյն ձեռնարկի վսեմ նպատակին, որն է թիկունք կանգնիլ մեր հայապահպանման գլխաւոր բերդին՝ մեր դպրոցին: Անցեալ տարիներու նման, տօնավաճառին հասոյթը կրկին պիտի տրամադրուի ՀՕՄ-ի Ամենօրեայ վարժարանի բարգաւաճման:

Ընկի. Մալեան շնորհակալութիւն յայտնեց մասնաճիւղիս նուիրեալ և անձնագոհ ընկերուհիներու աշխատանքին, որոնք շաբաթական հանդիպումներով, աւելի քան տասը ամիսներ շարունակ ոչ մէկ ճիգ չինսայեցին այս ձեռնարկի յաջողութեան, որը կը համարուի մասնաճիւղիս ամենակարեւոր ձեռնարկներէն մէկը: Ան նաեւ շնորհակալութիւն յայտնեց կոմիտէութեան և կեդրոնի տնօրէնութեան իրենց աջակցութեան համար:

Հ.Յ.Դ. կոմիտէութեան փոխ հերթապահ՝ ընկ. Արմէն Կետիկեան շեշտեց ՀՕՄ-ի առաքելութիւնն ու տարած աշխատանքը, ապա տէր Կոմիտաս Փանոսեան աղօթքով օրհնեց և մաղթեց ձեռնարկին յաջողութիւն: Թորոնթոյի «Ռուբինա» մասնաճիւղի ատենապետ ընկի. Իռէն Թէլիմի, բարի գալուստ մաղթելէ ետք, ներկայացուց 2016 տարեշրջանի տօնավաճառի բացման ժապաւենի հատման արժանացած ընկի.՝ Արփի Աճէմեանը:

ՀՕՄ-ի տարիներու վաստակաւոր ընկի.՝ Արփի Աճէմեան, ծնած և մեծցած է Լիբանան: 1961-ին, ընտանեօք փոխադրուած է Գանատա: Հայրը՝ Յարութիւն Մանուկեան հանդիսացած է Հ.Յ.Դ. Գանատայի հիմնադիրներէն: Իսկ, մայրը Հայկուհի Մանուկեան՝ Թորոնթոյի «Ռուբինա» մասնաճիւղի հիմնադիր անդամներէն 1963ին:

Ընկի. Արփի քառասուն տարիներէ աւելի իր ծառայութիւնը նուիրած է հայ գաղութին ստանցնելով զանազան պաշտօններ, որոնցմէ յիշենք՝ ՀՕՄ-ի վարժարանի կրթական մարմին և տնօրէնութիւն, ՀՕՄ-ի Գանատայի շրջանային վարչութեան փոխ ատենապետ, «Ռուբինա» մասնաճիւղի վարչական անդամ, ինչպէս նաեւ իր անդամակցութիւնը բերած է երիտասարդականի, Համազգայինի և ՀՄԸՄ-ի:

Այս տարուայ տօնավաճառը իւրայատուկ էր 25է աւելի հայ և օտար գործատէրերու և ընկերութիւններու մասնակցութեամբ, որոնք բացառիկ առիթը ունեցան ցուցադրելու և

կատարելու իրենց վաճառքը մօտ 1500 այցելուներու: Տօնավաճառը ունեցաւ նաեւ մանուկներու յատկացուած բաժին մը:

Տօնավաճառի յանձնախումբի անդամները եւ ՀՕՄ-ի ընկերուհիները ամիսներու տետողութեամբ անսպառ եռանդով կարողացան պատրաստել մեծ քանակով համեղ հայկական ճաշեր եւ անուշեղէններ, որոնք ամբողջութեամբ սպառուեցան այցելուներու կողմէ:

Հոս տեղին է յիշել նորահաստատ սուրիայահայ ընկերուհիներուն նուիրական մասնակցութիւնը տօնավաճառի զանազան աշխատանքներուն գծով:

Տեղի ունեցաւ նաեւ վիճակահանութիւն, որ մեծապէս քաջալերուեցաւ գաղութիս բոլոր անդամներուն կողմէ: Տոմսակները ամբողջութեամբ սպառեցան եւ բախտաւորները ստացան զանազան պարգէւներ, որոնցմէ կարելի յիշել 2 Mini I Pad-ներ:

Դեկտեմբեր 11-ին տեղի ունեցաւ մասնաճիւղիս Փոքրիկ Տօնավաճառը, Հայ Կեդրոնէն ներս եւ վայելեց թորոնթոհայութեան անսակարկ մասնակցութիւնը:

ՀՕՄ-ի Թորոնթոյի «Ռուբինա» մասնաճիւղի վարչութիւն